

Na osnovu člana 129. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj: 39/03, 22/06 i 43/10), člana 23. Odluke o organizovanju i funkcionisanju zaštite i spašavanja, ("Službeni glasnik općine Srebrenik" broj: 06/05, 09/09 i 02/11) i člana 38. Statuta Općine Srebrenik ("Službeni glasnik općine Srebrenik", broj: 1/08, Općinski načelnik Srebrenik, na prijedlog Službe za civilnu zaštitu broj: 10-44-93-298/18 od 02.08.2018. godine, d o n o s i :

## **O D L U K U**

### **O FORMIRANJU JEDINICE CIVILNE ZAŠTITE OPĆE NAMJENE OPĆINE SREBRENİK**

#### **I. OSNOVNE ODREDBE**

##### **Član 1.**

Ovom Odlukom formira se Općinska jedinica civilne zaštite opće namjene (u daljem tekstu: jedinica opće namjene) i utvrđuju njeni zadaci, područje djelovanja, način popune ljudstvom i materijalno-tehničkim sredstvima, obučavanje i osposobljavanje, finansiranje i druga pitanja značajna za organizaciju i funkcionisanje ove jedinice opće namjene, o čemu se neposredno brine Služba za civilnu zaštitu općine Srebrenik, u skladu sa ovom Odlukom.

##### **Član 2.**

Jedinica opće namjene na području Općine organizuje se, oprema i obučava za izvršenje zadataka na pružanju podrške: u provođenju mjera prve medicinske pomoći, za gašenje početnih i manjih požara, zaštiti od poplava, spašavanju ugroženih iz ruševina, izgradnji skloništa i zaklona, provođenju mjera RHB zaštite, evakuaciji i zbrinjavanju ugroženih i stradalih, transportu i snabdijevanju osnovnim sredstvima za ishranu, smještaju i zdravlju ugroženog stanovništva te zaštiti životinja, i te zadatke izvršava na području Općine Srebrenik na način predviđen ovom Odlukom.

#### **II. FORMIRANJE, ORGANIZIRANJE I ZADACI JEDINICE OPĆE NAMJENE**

##### **Član 3.**

U Općini Srebrenik, pri Općinskom štabu civilne zaštite formira se jedinica opće namjene u formaciji voda, na načelima teritorijalne popune, i jačine u skladu sa ličnom i materijalnom formacijom jedinice opće namjene.

Jedinica opće namjene se organizuje, oprema i obučava za izvršavanje zadataka na području Općine.

Pri organiziranju jedinice iz stava 1. ovog člana, polazi se od potreba i uvjeta koji su utvrđeni u Procjeni ugroženosti područja Općine Srebrenik od prirodnih i drugih nesreća, broj: 07-1503/15 od 26.10.2015. godine.

##### **Član 4.**

Organiziranje jedinice opće namjene iz člana 3. ove Odluke, Služba za civilnu zaštitu će vršiti po fazama kada se stvore odgovarajući kadrovski i materijalni uvjeti neophodni da se može formirati odgovarajuća jedinica.

##### **Član 5.**

Jedinica opće namjene angažuje se, po pravilu, na pružanju pomoći u radu određenih Službi zaštite i spašavanja, a mogu se angažirati i na vršenju raznih zadataka u akcijama zaštite i spašavanja

ugroženih i nastradalih ljudi od prirodne ili druge nesreće, za čije obavljanje nije potrebno posebno stručno znanje niti se koriste posebna tehnička i druga sredstva rada na izvršavanju tih zadataka.

U skladu sa odredbama člana 129. Zakona o zaštiti i spašavanju, jedinica opće namjene poslove iz svoje nadležnosti vrše tako što se angažiraju kao podrška i pomoć u radu sljedećih Službi zaštite i spašavanja, i to:

1. Služba za zaštitu od požara
2. Služba medicinske pomoći
3. Služba za spašavanje iz ruševina
4. Služba za čistoću i asanaciju terena
5. Gorska služba spašavanja
6. Služba za zaštitu i spašavanje životinja i namirnica životinjskog porijekla
7. Služba za vodosnabdijevanje
8. Služba za logistiku/snabdijevanje.

### III. LIČNA I MATERIJALNA FORMACIJA JEDINICE OPĆE NAMJENE

#### Član 6.

Jedinica opće namjene se obrazuje u formaciji voda prema ličnoj i materijalnoj formaciji utvrđenoj Odlukom o utvrđivanju ličnih i materijalnih formacija štabova, povjerenika i jedinica civilne zaštite („Službeni glasnik općine Srebrenik“) broj: 11/07.

Ta formacija je utvrđena u skladu sa Okvirnim ličnim i materijalnim formacijama štabova, jedinica i povjerenika civilne zaštite i službi zaštite i spašavanja, broj: 01-02/ 2-187/07, od 15. 05. 2007. godine, koje je donio direktor Federalne uprave civilne zaštite.

Lična formacija jedinica iz stava 1. ovog člana, sadrži ukupan broj ljudstva potreban za jedinicu, godine rođenja, vrstu stručne spreme i druge uvjete koje pripadnici jedinice moraju ispunjavati, a materijalna formacija te jedinice sadrži vrstu i količine materijalno-tehničkih sredstava i opreme koja je potrebna za izvršavanje zadataka iz nadležnosti te jedinice.

### IV. POPUNA LJUDSTVOM I OPREMANJE MATERIJALNO-TEHNIČKIM SREDSTVIMA

#### Član 7.

Popuna jedinice opće namjene potrebnim ljudstvom vrši se prema njenoj ličnoj formaciji, i to prema stručnoj spremi i drugim uvjetima koji su određeni ličnom formacijom.

#### Član 8.

Služba za civilnu zaštitu vrši popunu jedinice potrebnim ljudstvom putem zaključivanja ugovora sa angažovanim osobama o njihovim pravima i obavezama, dok su angažirani u toj jedinici.

#### Član 9.

Opremanje jedinice vrši se namjenskom opremom i sredstvima kojima raspolaže Služba za civilnu zaštitu.

Oprema i sredstva koja nedostaju, a utvrđena su u materijalnoj formaciji, osiguravaju se putem nabavke koju vrši Služba za civilnu zaštitu.

Nabavka namjenske opreme i sredstava iz stava 2. ovog člana vršit će se prema godišnjim planu korištenja sredstava posebne naknade, koje donosi Služba za civilnu zaštitu, uz pribavljeno mišljenje Općinskog štaba civilne zaštite.

## V. PODRUČJE DJELOVANJA JEDINICE OPĆE NAMJENE I NJIHOVO ANGAŽIRANJE

### Član 10.

Jedinica civilne zaštite opće namjene, poslove i zadatke iz svoje nadležnosti obavlja na potpunom području općine Srebrenik.

Jedinica civilne zaštite opće namjene, na zahtjev ovlaštenog organa, može se angažovati i kao ispomoć drugim općinama u Federaciji BiH, Brčko distriktu BH o čemu odlučuje Općinski štab civilne zaštite.

### Član 11.

O angažiranju jedinice opće namjene na zaštiti i spašavanju odlučuje Općinski štab civilne zaštite.

Izuzetno, u slučaju potrebe hitnog angažiranja jedinice opće namjene, ako Općinski štab civilne zaštite nije u mogućnosti da se odmah sastane, tada angažiranje jedinica naređuje komandant Općinskog štaba. U slučaju da je komandant Općinskog štaba odsutan ili iz drugih razloga spriječen da obavlja posao komandanta, angažiranje jedinice opće namjene naređuje načelnik Općinskog štaba.

O angažiranju jedinice opće namjene, prema stavu 2. ovog člana, komandant, odnosno načelnik Općinskog štaba, dužni su, na prvoj narednoj sjednici, upoznati Općinski štab civilne zaštite o razlozima angažiranja jedinice opće namjene, mjestu i vremenu angažiranja.

Naredba o angažiranju jedinice opće namjene sadrži: naziv jedinice koja se angažira, područje na kojem će djelovati, vrijeme angažiranja i obaveze Službe za civilnu zaštitu u vezi sa realizacijom naredbe Općinskog štaba. Služba za civilnu zaštitu je dužna pripremiti odgovarajuće akte i druge podatke potrebne za odlučivanje Općinskog štaba civilne zaštite.

Služba za civilnu zaštitu je dužna redovno informisati Općinskog načelnika o angažiranju jedinica opće namjene na zaštiti i spašavanju, o vremenu i mjestu angažiranja i ostvarenim rezultatima.

### Član 12.

Kada se naredi angažiranje jedinice opće namjene, ona se priključuje odgovarajućoj Službi zaštite i spašavanja i izvršava one poslove i zadatke na zaštiti i spašavanju koje naredi rukovodilac te Službe.

### Član 13.

Komandovanje jedinicom opće namjene u svim operativnim situacijama njenog angažiranja, po naredbi Općinskog štaba civilne zaštite, vrši komandir te jedinice, a komandovanje nižim organizacionim dijelovima jedinice (ekipama i timovima) vrše vođe ekipa, odnosno timova predviđenih ličnom formacijom te jedinice.

U slučajevima kada je na području Općine proglašeno stanje prirodne i druge nesreće, angažirana jedinica opće namjene izvršava zadatke iz svoje nadležnosti na području koje odredi Općinski štab koji na tom području rukovodi akcijama zaštite i spašavanja i postupa po naredbama tog štaba.

## VI. NADLEŽNOSTI SLUŽBE ZA CIVILNU ZAŠTITU

### Član 14.

Služba za civilnu zaštitu, u odnosu na jedinicu opće namjene iz člana 3. ove Odluke, vrši sljedeće poslove:

- 1) predlaže ličnu i materijalnu formaciju jedinice opće namjene,
- 2) vrši popunu jedinice opće namjene ljudstvom, materijalno - tehničkim sredstvima i opremom, u skladu sa ličnom i materijalnom formacijom,

- 3) organizira i provodi obučavanje i osposobljavanje pripadnika jedinice opće namjene na način predviđen u članu 15. ove Odluke,
- 4) izrađuje plan osiguranja prevoznih sredstava koja će se moći koristiti za prevoz pripadnika jedinice opće namjene i sredstava i opreme koje ta jedinica mora koristiti u svom radu do mjesta njenog angažiranja po naredbi Općinskog štaba,
- 5) organizira i vrši sve poslove da se jedinica opće namjene blagovremeno preveze do mjesta na kojem će vršiti spašavanje ugroženih ljudi po naredbi Općinskog štaba,
- 6) planira i nabavlja opremu i sredstva potrebnih za rad jedinice opće namjene,
- 7) planira i osigurava finansijska sredstva potrebna za naknade i druge troškove kada jedinica opće namjene bude angažirana na vršenju zadataka,
- 8) vrši i sve druge poslove koji se odnose na organiziranje, pripremanje i upotrebu jedinice opće namjene.

## VII OBUČAVANJE I OSPOSOBLJAVANJE JEDINICE OPĆE NAMJENE

### Član 15.

Obučavanje i osposobljavanje pripadnika jedinice opće namjene iz člana 3. ove Odluke za vršenje poslova iz njihove nadležnosti koji su utvrđeni u članu 5. ove Odluke, vrši se po nastavnim planovima i programima koje donosi direktor Federalne uprave civilne zaštite.

Planovi i programi iz stava 1. ovog člana sadrže materiju koja se odnosi na poslove iz nadležnosti jedinice, način izvođenja obuke ( teorijski dio, vježbe, testiranja i slično), vrijeme potrebno za izvođenje obuke, mjesto izvođenja obuke, uvjete za izvođače obuke i materijalno - tehnička i finansijska sredstva potrebna za izvođenje obuke.

## VII FINANSIRANJE JEDINICA OPĆE NAMJENE

### Član 16.

Finansijska sredstva potrebna za obavljanje poslova iz nadležnosti jedinice opće namjene, kao i nabavku opreme i drugih tehničkih sredstava potrebnih za rad te jedinice, te za finansiranje zadataka iz članova 14. i 15. ove Odluke planiraju se i osiguravaju u Budžetu Općine, a dio iz sredstava posebne naknade za zaštitu i spašavanje, koja se ostvaruju po članu 180. Zakona o zaštiti i spašavanju.

Finansijska sredstva po osnovu člana 180. Zakona o zaštiti i spašavanju, za potrebe finansiranja jedinice opće namjene, planiraju se u skladu sa Odlukom o uvjetima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća ("Službene novine Federacije BiH", broj:4/12 i 80/13).

U 2018 godini nisu planirana sredstva u budžetu, niti će biti potrebno izdvajanje bilo kakvih sredstava za funkcionisanje jedinice civilne zaštite opće namjene, te se Odluka o formiranju jedinice prvenstveno odnosi za popunu jedinice.

Kantonalna uprava civilne zaštite Tuzla, će nakon formiranja, izvršiti opremanje jedinice osnovnom opremom i sredstvima, iz svojih sredstava.

### Član 17.

Finansijska sredstva iz člana 16. ove Odluke planiraju se i osiguravaju za sljedeće namjene:

- 1) za nabavku sredstava i opreme za rad jedinice opće namjene koja su utvrđena njenom materijalnom formacijom,
- 2) za troškove provođenja stručnog obučavanja i osposobljavanja pripadnika jedinice opće namjene prema planovima i programima te obuke,

3) za troškove prevoza pripadnika jedinice opće namjene do mjesta njihovog angažiranja u zaštiti i spašavanju ugroženih ljudi i materijalnih dobara od prirodne ili druge nesreće u skladu sa članom 12. ove Odluke, kao i za troškove koji nastanu u toku djelovanja jedinica na spašavanju ljudi i materijalnih dobara ( smještaj, ishrana, naknade plaća i druge naknade pripadnicima jedinice i druge troškove) iz člana 20. ove Odluke.

#### Član 18.

Služba za civilnu zaštitu predlaže visinu sredstava koju treba osigurati u budžetu Općine, kao i visinu sredstava koja se osiguravaju iz posebne naknade po članu 180. Zakona o zaštiti i spašavanju, za namjene iz člana 17. ove Odluke.

Financijska sredstva osigurana prema stavu 1. ovog člana koriste se u skladu s godišnjim planom korištenja sredstava posebne naknade, koji donosi Služba za civilnu zaštitu, uz prethodno pribavljeno mišljenje Općinskog štaba.

#### Član 19.

Pripadnicima jedinice civilne zaštite opće namjene, kada se po naredbi Općinskog štaba angažiraju na spašavanju ljudi iz svoje nadležnosti, za vrijeme angažiranja na tim zadacima, pripada pravo na naknadu i druga prava utvrđena u članu 18,19, 20.i 21. Zakona o zaštiti i spašavanju. Obračun naknada i troškova iz stava 1. ovog člana vrši Služba civilne zaštite.

### IX. PRELAZNE I ZAVRŠNE ODREDBE

#### Član 20.

Dinamika i realizacija zadataka utvrđenih Odlukom za formiranje, opremanje i obučavanje jedinice civilne zaštite opće namjene vršit će se u skladu sa dinamikom utvrđenom Programom razvoja i zaštite i spašavanja ljudi i materijalnih dobara od prirodnih i drugih nesreća u Općini Srebrenik i prema prioritetima koji proizilaze iz Procjene ugroženosti Općine Srebrenik od prirodnih i drugih nesreća.

Prioritete u realizaciji pojedinih zadataka utvrđuje Služba za civilnu zaštitu, uz pribavljeno mišljenje Općinskog štaba.

#### Član 23.

Ova Odluka stupa na snagu danom donošenja a objaviće se u “Službenom glasniku općine Srebrenik”.

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINA SREBRENİK

Broj: 07-1054/18  
Srebrenik, 03.08.2018. godine

NAČELNIK OPĆINE:

Dr.sc. Nihad Omerović, s.r.